

Pisortat ingerlatseqatigiiffiisa allattugaataanik innuttaasut piniarsinnaalersinnissaat anguniarlugu

pisortat ingerlatsinerat pillugu paasitinneqarsinnaatitaanermut Inatsisartut inatsisaat allannortittariaqarnersoq pillugu apeqquteqaat allaavigalugu oqallinnissamik siunnersuut

(Inatsisartunut ilaasortaq Justus Hansen, Demokraatit)

Akissuteqaat

(Naalackersuisut Siulittaasuat)

Aallaqqaasiutigalugu Naalackersuisut Justus Hansenip (Demokraatit) pisortat ingerlatseqatigiiffiisa allattugaataanik innuttaasut piniarsinnaalersinnissaat anguniarlugu pisortat ingerlatsinerat pillugu paasitinneqarsinnaatitaanermut Inatsisartut inatsisaat allannortittariaqarnersoq pillugu apeqquteqaat allaavigalugu oqallinnissamik siunnersuuteqarneranut qujapput. Taanna ingerlatseqatigiiffiit pisortanit pigineqartut pillugit pissutsit pingaarutillit ilisimaneqarnerulernissaannut periarfissiivoq.

Ingerlatseqatigiiffiit Namminersorlutik Oqartussanit pigineqartut inatsit naapertorlugit qaqugukkulluunniit ingerlatsinissaat Naalackersuisut ersarissamik kissaatigaat.

Danmarkimi paasitinneqarsinnaatitaaneq pillugu inatsimmi nutaami paasitinneqarsinnaatitaanerup ingerlatseqatigiiffinnut pisortanit 75%-init annerusumik pigineqartunut aallaaviatigut tamanut atuunera pillugu aalajangersagaqartoq siunnersuuteqartup oqarnera eqqorpoq. Taamaakkaluartoq tamanna ingerlatseqatigiiffinni børsimi nalunaarsorneqarsimasuni atuutinnilaq. Taassuma saniatigut paasitinneqarsinnaatitaaneq pillugu inatsit ingerlatseqatigiiffinnut sorlernut atuuttuussaneraniq tunngavissiaq pingaarnaq atuuttariaqarpoq, tassanilu apeqqutaavoq ingerlatseqatigiiffik ingerlatseqatigiiffinnut namminersortunut toqqaannartumik unammillertuunersoq imaluunniit ingerlatseqatigiiffik pisortani aalajangiisinnaatitaanersoq.

Siunnersuuteqartup oqallinnissamik siunnersuummini eqqaavaa sulianik sullissisarnermut inatsit aamma paasitinneqarsinnaatitaaneq pillugu inatsit INI A/S-imut atuutilerneqareersut. Tamanna eqqorpoq tamannalu ingerlatseqatigiiffiit sorliit ingerlatsinermi paasitinneqarsinnaatitaaneq pillugu maleruagassani malinnissanerannik takussutissatsialaavoq. Namminersorlutik Oqartussani kommuninilu amerlanerni inissiat attartortakkat INI A/S-ip allaffissornikkut ingerlappai, tassa Naalackersuisut kommunillu INI A/S-imik atuisut aalajangersimapput inissiat pillugit allaffissornerit pisortat ingerlatsivianit ingerlatseqatigiiffimmut nuunneqassasut. Ilisimatitsissutigisinnaavara paasitinneqarsinnaatitaaneq pillugu inatsit Illuut A/S-imut atuunnissaattaaq isumaqatigiissutigineqarnikummat.

Akerlianili suliffeqarfiit paasitinneqarsinnaatitaaneq pillugu inatsimmik annertoqataanik malinnittussaataappata taakkununga unammeqataasunut ajornartorsiortingsaatsiarsinnaavoq. Taamaattoqassappat alla niuernikkut pissutsit pillugit paasissutissat pingaarutilinnik paasitinneqarnissamut qinnuteqarsinnaavoq. Tamanna ingerlatseqatigiiffimmi aningaasaqarneq aamma niuernikkut pissutsit pillugit paasitikkusunngisanik ingerlatseqatigiiffimmut ajoqutaasumik siammarterititseqataasinnaammat. Naalakkersuisut pingaartippaat ingerlatseqatigiiffiit Namminersorlutik Oqartussanit pigineqartut ingerlatseqatigiiffiillu namminersortut naligiillutik assigiinnillu pisinnaatitaaffeqarlutik unammilleqatigiissinnaanissaat.

Naalakkersuisut isumaqarput ingerlatseqatigiiffiit assigiinngisitaangaatsiarnerat eqqarsaatigineqartariaqartoq.

Assersuutigalugit suliffeqarfiit soorlu INI A/S aamma Illuut A/S akissummi taaneqareersut.

Ingerlatseqatigiiffiit allaanerusut attaveqaatinut pilersuinermillu suliffeqarfiusut soorlu Royal Arctic Line A/S, Kalaallit Airports A/S, Tele Greenland A/S, KNI A/S aamma Sikuki Nuuk Harbour A/S, ilaat annerusumik ilaallu annikinnerusumik unammillertuullutik suliffeqarfimik ingerlatsisupput.

Ingerlatseqatigiiffiit immikkoortut pingajuattut assersuutaasinnaapput ineriartortitsisut soorlu Greenland Holding A/S aamma Visit Greenland A/S. Ingerlatseqatigiiffinni soorlu makkunani ingerlateqatigiiffinnik piginneqataasut ataqatigiissagaanerat toqqarneqarpoq ilaatigut suliffeqarfinnut namminersortunut aningaasaliinissanut tunngasuni politikikkut taassumalu ilagisaattut allaffissornikkut akulerutsitsinani suliassaqarfiit pineqartut pillugit aalajangeeriaatsit qulakkeerniarlugit.

Ingerlatseqatigiiffiit assigiinngitsut sisamaasa ilaat taasinnaavoq Royal Greenland A/S, niuerfissuarmi unammiffiusumi tamakkiisumik niuernerpalaartumik ingerlanneqarpoq.

Allatut oqaatigalugu ingerlatseqatigiiffiit kalaallit inuiaqatigiinni atuuffii assigiinngitsut ingerlatsivittut suliffeqarfittullu assigiinngitsorpassuartigut suliaqartuupput, soorlu ilaat unammineqarnerusut ilaallu unammineqarpiaratik. Eqqumaffiginiassallugu pingaaruteqarpoq.

Ingerlatseqatigiiffiit Namminersorlutik Oqartussanit pigineqartut ingerlatsineranni aallaaviatigut assigiinnik periarfissaqarnissaat Naalakkersuisut anguniagaraat. Tamanna ima paasineqassaaq, ingerlatseqatigiiffik Namminersorlutik Oqartussanit pigineqarnini pissutigalugu namminersortumut unammilleqammut sanilliullugu arlaatigut iluaqutissaqarnerussanngitsoq ajoqutissaqarnerussanngitsorlu. Taamaattoqartillugu niuerfimmi piumasaqaatit assigiit tamanut atuuttariaqarput, tassa paasinnissinnaanermut periarfissat ammasuunissamullu pisariaqartitat ingerlatseqatigiiffinnut inatsimmut aamma ukiumoortumik naatsorsuutit pillugit inatsimmut tunngavissiat aallaavigalugit aaqinneqarsinnaallutik.

Pisortat namminersortullu suliffeqarfiutaat eqqarsaatigalugit Naalackersuisut suliniutinik niuerfimmi atugassarititaasuni equtitsilersinnaasunik tapersersuisinnaanngillat. Taamaakkaluartoq Naalackersuisut ammasuunissamut kissaat paasilluarsinnaavaat. Naalackersuisut ingerlatseqatigiiffiit Namminersorlutik Oqartussat pigineqartuni aqutsisut kaammattorpaat ingerlatseqatigiiffinnik aqutsinermut maleruagassanik maleruaassasut ammasuunissamullu atatillugu inatsisini allassimasut malinneqarnissaat qulakkiissagaat.

Naalackersuisuniit taamatut oqaaseqarluta Inatsisartut oqallinnissaat qilanaaraarput.